

TE HEHEURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete. i te mau avae atoa.
Te hoo e piti farane i te matahiti hoê.

Nu. 8.

Atete 1927.

Mat. 21.

*Te parau atu nei râ vau ia outou, E aroha'tu i to outou
mau enemy; e faaora'tu i tei tuhi mai ia outou; e hamani
maitai atu i te feia i riri mai ia outou; e pure hoi i te feia i
parau ino mai e tei hamani ino mai ia outou. (Mataio 5:44)*

Te Maitai o te Feia Mo'a

U A FAAOTIHIA te neneiraa o te Buka a Moromoua i te
avaé Mati i te matahiti 1830. Ua farii na Iosepha i
te hoé orama hanhana, e ua boroahia mai te mau apî auro
ia'na, no reira mai te Buka a Moromoua. I te 6 nō Eperela
i tera ihora matahiti, oia hoi, i te matahiti 1830, i faatiahia
ai te Ekalesia a Iesu Mesia i te Feia Mo'a i te Mau Mahana
Hopea Nei.

Ua tae mai te mau hamani-ino-raa e rave rahi i nia iho
ia Iosepha Semita, faarue atura oia i te tufaa fenua Niu
Ioka (New York) a haere atu ai oia i te fenua Ohaio, Ua
imi-haere-bia oia i taua vahi ra, no reira na faarue atura i
Ohaio, e ua haere oia i Missouri. Ua pari-haavare-hia Io-
sepha, ei taata orure han, e ua afaihi'tu i mua i te haava-
raa.

Tera mai te tumu i haavahia'i oia, i te mea e, ua tiaturi
papu oia i te tohuraa i papahia i roto i te Daniela i te pene

piti e te irava maha ahuru e ma maha, e ua na ô maira tauu parau ra e, "Ia tae i te anotau o taua mau arii ra, e faatupu ai te Atua o te raí ra i te hoé basileia, o te ore roa ia e mou, e ore hoi e riro ia vetahi ê; e hope roa hoi taua mau basileia ra i te parare e e pau, e vai tera e a muri noa'tu."

Ua afai-ino-hia oia i mua i tera haavaraa, no te mea, ua faaroo oia e, e tupu mau taua tohuraa ra. Ua ani mai te haava ia'na e, "Te faaroo nei anei oe i teie parau tohu?"

Ua pahono atura Iosepha ia'na e, "E, te faaroo papu nei au i tera tohu, e te toea hoi o te mau parau i papaihia."

Ua parau atura to Iosepha avaota e, "Mai te mea, e faautuahia oia ei taata orure hau, e faariro ia oe i te Bibilia ei tumu no te mau orure hau atoa."

Ua tiahihia te Feia Moá i rapae au i te fenua Missouri, e ua haere ratou i te fenua Ilinoi, e ua farii-maitai-hia e to Ilinoi, ua imihia ihora hoi te mau ravea, ia maitai ratou i reira.

Ua imi-faahou-hia to te Ekalesia i Ilinoi, e ua faarue atoa ratou i te reira vahi. Ei te avaé Febuare i te matahiti 1846, ua faarue atura ratou i te oire ra i Navu, e ua hamata mai ratou i te tereraa mai i te tooa o te râ. Ua farrerei noa ratou i te mau ati e te peapea huru rau. Na roto râ i to ratou itoito e to ratou tiaturi papu i te Atua, i tae atu ai ratou i Utaha. Ei reira, ua faariro ratou i te medebara ei parahiraa no te Feia Moá. Ua ani-noa-hia te mau taata no te hau ei tauturu ia ratou, aita râ ratou i faatia, na roto râ i ta ratou ohipa i faarahihia'i te mau hamani-ino-raa i nia iho i te Feia Moá.

I te reira tau a vai ai te reira huru peapea i nia iho i te Fei Moá, ua anihia e pae hanere taata i te tauturu atu i te hau, e haere atu i Mexico i te tamaí. Ua haere tera pupu taata mai te itoito rahi. Ua tamaí atura ratou, e ua riro ia ei faaite-papu-raa no te maitai o te Feia Moá. Noa'tu e, ua hamani-ino-hia ratou, ua haere noa â.

Papaihia e --Ioane Orotona

Te Faaroo no te Feia Mo'a Mau.

Ua iritihia teie nei parau na roto mai i te buka, Te Faaroo no te Feia Mo'a Mau tei papaihia e Tamate; Faaauhia ei reo Tahiti e Ioane Orotona.

*Te faaroo nei matou e, o taua mau faaueraa ra; * * *
te toru ra, te bapetizoraa ia i raro i te pape ia matara te hara; **

(E tuatiraa teie nei parau.)

Uiraa 8. Eaha te mau mea i faaauhia'i te parau bapetizo i roto i te Bibilia?

P. Ua faaaau Iesu i te bapetizo i te fanauraa. Ua na ô maira oia e, "Ia ore te taata e fanau faahou, e ore ia oia e ite i te basileia." (Ioane 3:3-5) Ua faaaau-atoa-hia te bapetizo i te hunuraa i te pohe e te tia-faahou-raa. E na roto hoi i to te taata hunaa-raa-hia i roto i te pape e to'na faatia-faahou-raa-hia i nia e faaorehia'i te hara. "Aita outou i ite o tatou atoa tei bapetizohia i roto i te Mesia ra ia Iesu, ua bapetizohia ia i roto i to'na ra pohe? E teie nei, ua tanuhia tatou e oia atoa, i te bapetizoraahia i roto i to'na ra pohe; mai te Mesia i faatiahia e te mana o te Metua i te poheraa ra, ia haapao atoa tatou i te haerea e au i te ora apî. I apiti-atoa-hia hoi tatou ia'na i te huru o to'na ra pohe, e apiti-atoa ia tatou i te huru o to'na ra tia-faahou-raa i nia." (Roma 6:3-5) Hiópoa tatou i te mau huru bapetizoraa atoa, o teihia te bapetizoraa tei au i te fanauraa, te hunuraa e te tia-faahou-raa? Aita'tu e huru bapetizoraa, maori râ, te bapetizoraa utuhi anaé.

Uiraa 9. Eaha te mau parau papai tei haapapu i te manaó e, ua tiá te bapetizoraa utuhi?

P. Ua bapetizohia Iesu i te bapetizoraa utuhi, no te mea, te na ô mai nei te parau e, "Ua haere maira oia i nia mai raro mai i te pape." (Mataio 3:16-17) Ua fariihia hoi to'na bapetizo-raa-hia e To'na ra Metua no te mea, ua tonohia mai te Varua Maitai i nia iho Ia'na, e ua faaroo-atoa-hia, te reó o To'na ra Metua no nia mai i te raí ra, i te na

ô raa mai e, "Tau Tamaiti here teie, ua mauruurn roa vau ia'na." "Te baptizo ra Ioane Baptizo i Aino i pihai iho i Salima, no te mea e rave rahi to reira pape." (Ioane 3:23) Ua haere Ioane Baptizo i reira, baptizo ai i te taata no te mea, ua au te vahi pape i te reira. Ahiri e, na tano te baptizoraa pipi ra, eaha'tura te faufaa ia titau i te vahi pape? Ua ravai te hoé auá pape no te baptizoraa i te hoé nunaa out taata ~~pa~~toá. E mea rahi atu â hōi te mau irava tei riro ei haapapuraa i teie manaó.

Uiraa 10. Nahea ta Iesu haapiiraa i te Ati Nephi no nia iho i te huru o te baptizo?

P. "Amene, e parau atu vau ia outou, o te tatarahapa i ta'na ra mau hara na roto i ta outou mau parau, e te hinaaro ia baptizohia i to'u ra i'oa, e na ô nei outou i te baptizo ia ratou: inaha, e haere outou i raro i te pape tia noa'i, ei to'u ra i'oa e baptizo outou ia ratou.

"E inaha, tera te mau parau ta outou e faahiti, ua oti outou i te faahiti i to te taata i'oa, a na ô aé ai e, Note mana i tuuhia mai ia'u e Iesu Mesia, te baptizo nei au ia oia te i'oa o te Metua, e no te Tamaiti e no te Varua Maitai. Amene.

"Ei reira faahopu ai ia'na i raro i te pape, a haere faahou mai ai i rapae i te pape." (III Nephi 11:23-26)

Uiraa 11. Nahea ta Iesu haapiiraa mai i te parau no te baptizo i teie mau mahana hopea nei?

P. O Iosepha Semita, e o Olive Taudere ia, na taata matamua i baptizohia i teie mau mahana hopea nei. E ua baptizo rana te tahi i te tahi, mai te au i te faaneraa a te melahi, e o Ioane Baptizo ia tana melahi ra, o tei faaineine i te eá o te Fatu i mutaa i hora.

Ua haapii maira te Atua i to te Ekalesia na roto ia Iosepha Semita no nia i te parau no te baptizo. Ua na ô maira tana haapiiraa ra e, "Na ô te haapaoraa i te baptizoraa ia ratou tei tatarahapa—Te taata tei mai ti-mau-hia

*Fuati
ira parau*

e te Atua ra, e mana hoi to'na no ô mai ia Iesu Mesia ia bapetizo, e haere oia i roto i te pape i pihai iho i te taata tei tuu mai ia'na iho no te bapetizo, e pure atu oia, mai te faahiti i te i'oa o taua taata e bapetizohia ra, na ô atu, "*No te mana i tuuhia mai ia'u e Iesu Mesia, te bapetizo nei au ia oe i te i'oa o te Metua, e no te Tamaiti, e no te Varua Maitai. Amene.*" E i reira, e faataoto oia ia'na i raro aê i te pape, e afai faahou mai ia'na i nia, mai raro mai i te pape." (Buka Fafan 20:22-24)

Aita te Atua i faaau i te mau parau no te bapetizo, ahiri e, aita oia i hinaaro ia haapaô-mau-hia taua huru bapetizoraa ra. No reira, aita to te mau Peresibutero e te mau tahná o te Ekalesia, e mana no te faahuru-ê-raa'tu i te hoé vahi iti o teie huru bapetizoraa, mai te vai iho atu e aore râ faaamui mai i te hoé vahi iti.

Uiraa 12. Te vai ra anei te ravea e bapetizo-faahou-hia'i te taata?

P. Te vai ra te ravea, oia hoi, mai te mea na faaruê te hoé taata i te Ekalesia, e aore râ, ua hurihia i rapae, e i muri aê, ua tatarahapa oia; te vai ra te ravea e ô faahou ai oia i roto i te Ekalesia, oia hoi, na roto i te uputa o te bapetizo. Aita râ e faahuru-ê-hia te bapetizoraa, e bapetizohia râ oia mai te mea ra e, aita â oia i bapetizohia.

Uiraa 13. Ua haapaohia anei te bapetizo-faahou-raa i mutaa i hora?

P. E, ua haapaohia ia. A haamanaô tatou i ta Paulo bapetizoraa'tu i te tahi mau pîpî i Ephesia, noa'tu e, ua bapetizo-ê-hia na ratou i te bapetizoraa a Ioane ra. Te tumu Paulo i bapetizo faahou ai ia ratou no te mea, aita oia i ite e, e mea mana to ratou bapetizo-raa-hia. No te mea, ua uini noa oia ia ratou, e na roto hoi i te mau uiraa, i ite ai oia e, te vai ra te hoé mea toe ia ratou. Ua ui maira Paulo ia ratou e, "Ua noaa anei ia outou te Varua Maitai i

to outou vai faaroora nei?" Ua parau maira ratou ia'na, "Aita matou i ite e, i horoahia mai te Varua Maitai." Ua ui faahou maira oia mai te maere rahi, "I baptizohia hoi outou i te aha?" Ua pahono maira ratou e, "I te baptizoraa a Ioane ra." No te mea râ, ua paran maira ratou e, aita â matou i farii i te Varua Maitai, manaó aéra oia e, aita ta ratou baptizo-raa-hia i ravehia i raro aé i te rima mana. Ua baptizo Ioane i roto i te pape no te faaoreraa i te hara. Ua haapii râ oia e, te vai ra te baptizoraa rahi i muri aé o te afaihia mai e Iesu Mesia, e taua baptizoraa ra, o te hororaa ia i te Varua Maitai, na roto i te tuuraa rima. (A taió i te Ohipa 19:1-6) No reira, ua baptizo Paulo ia ratou ra, e oti aéra, ua tun atura oia i to'na rima i nia ia ratou, e ua farii i hora ratou i te Varua Maitai.

Uiraa 14. Ua tia anei ia baptizo noa i te hoé taata i te mau taime e rave rahi, ia faaore-ohie-noa-hia ta'na ra mau hara?

P. Aita e tia ia na reira, ahiri e, ua faatiahia te reira, na roto i te reira huru raveraa, ua faaorehia to te taata riáriá i te hara. Ua rave iho â ratou i te mau ohipa au ore atoa, a tae i te pae hopea ra, faaore i te reira mau hara, na roto i te baptizo. Aita te baptizo e faaore i te hara o te mau taata tei oti i te baptizohia. E faaorehia râ ta ratou mau hara na roto i to ratou faaíraa'tu i ta ratou mau hara, mai te opua papu eita ratou e na reira faahou.

(Tuatihia teie nei parau.)

Haapiiraa no te Autahu'araa

Uiraa 1. Eaha te Autahu'araa Moá?

P. O te mana ia o te Atua i nia iho i te mau taata to-roa i roto i te Ekalesia a Iesu Mesia.

Uiraa 2. Ehia Autahu'araa Moá i roto i te Ekalesia a Iesu Mesia?

P. E piti ia Autahu'araa i roto i te Ekalesia a Iesu

Mesia: te Autahuáaraa a Melehizedeka, e te Autahuáaraa a Aarona, ei apiti-atoa-hia i reira te Autahuáaraa a Levitiko. (Taió i te Buka Fafau 101; B.F.S. 104.)

Uiraa 3. No te aha i parauha'i i te Autahuáaraa a Melehizedeka?

P. Te mea i parauhia'i i te Autahuáaraa a Melehizedeka, no te mea e tahuá rahi roa e te tuiroo o Melehizedeka i te tau no Aberahama ra.

Uiraa 4. I mua atu râ ia Melehizedeka, ua parauhia ia taua Autahuáaraa ra i te aha?

P. Ua parauhia ia i "te Autahuáaraa mai te au i te Tamaiti a te Atua ra;" e no te faaturaraa i te i'oa o te Metua e te Tamaiti, ei faaore i te faahiti-pine-pine-raa i taua na i'oa moá ra, i monohia'i te i'oa tumu o teie nei Autahuáaraa rahi e te i'oa apî, oia a Melehizedeka.

Uiraa 5. Ehia toroá i roto i te Autahu'araa a Melehizedeka?

P. E pae ia toroá, oia hoi: Peresibutero, Hitu Ahuru Tahu'a Rahi, Patereareha, Aposetolo. Te vai atoa nei te toroá Peresiteni i nia iho i te Ekalesia i te ao atoa nei.

Uiraa 6. Ehia toroá i roto i te Autahu'araa a Aarona?

P. E maha ia toroá, oia hoi: Diakono, Haapii, Tahuá Episekopo.

Uiraa 7. Eaha na toroá aiá e piti, tei hee mai, mai te metua e te tamaiti?

P. Te toroá Petereareha no te Autahuáaraa a Melehizedeka; e te toroá Episekopo no te Autahuáaraa a Aarona.

Uiraa 8. Na vai e faatoroá i te mau orometua haapii Evanelia, oia hoi te mau Patereareha?

P. Na te Peresiteniraa Matamua, e aore ia, na te Ahuru ma piti Aposetolo, o te riro ei mono no te Peresiteniraa Matamua, e faatoroá i te mau Patereareha i roto i te mau amaa rarahi a te Ekalesia. B.F. 107:39 B.F.S. 104:17

Uiraa 9. Eaha te huru no teie nei Autahuáaraa?

P. Ua haapaohia ia ia hee mai, mai te metua i nia i te tamaiti, e te tiaraa mau ra, ei nia mau ia i te huaai mai-tihia, e o tei parauhia mai ia. I te anotau ia Adamu ra te faatumuraa i te reira huru; e ua faaterehia maira na nia i te huaai mai reira mai â.

Uiraa 10. Eaha te ohipa a te toroa Patereareha i roto i te Ekalesia?

P. Te ohipa a te toroa Patereareha, ohipa haamaitai ia; e no reira e ere ia i te ohipa faatere, mai ta te Tahuá rahi; ua maiti-noa-hia ratou no roto mai i te mau Tahuá Rahi, tuuhia'tura ratou ei toroa taaê, no te maitai o te Feia Moá.

Uiraa 11. Teihea toroa te hee mai, mai te metua mai i te Tamaiti i roto i te Autahuáaraa a Aaronā?

P. Te toroa Episekopo ia; aita e tia i te hoé taata ia mau i te toroa Episekopo, maori râ e huaai mau oia no Aaronā. Na te Peresideni Matamua, e aore ia, na te Ahuru ma piti Aposetolo, o te riro ei mono no te Peresideniraa Matamua, e faatoroa ia'na ei Episekopo.

Uiraa 12. Mai te peu e, ia ore ia iteahia te huaai mau no Aaronā, na vai ia e mau i te toroa Episekopo i roto i te Ekalesia?

P. E tia atoa i te Tahuá Rahi no te Autahuáaraa a Melehizedeka ia mau i te toroa Episekopo, na roto i te faaue-raa a te Peresideniraa matamua. Buka Fafau 107:68-73; 20:67; B. F. S. 104:32,33. E na te Peresideniraa Matamua e aore râ, na te mau Aposetolo e faatoroa ia'na. Buka Fafau 107:16,17.

Uiraa 13. Inafea i faatiahia'i te Peresideni Matamua no te Ekalesia a Iesu Mesia i te Feia Moá i te Mau Mahana Hopea Nei?

P. I te 25 no Tenuare, matahiti hoé tauatini e vaú hanere e toru ahuru e ma piti (1832.) Ua fariihia, e ua

faatoroahia Iosepha Semita (metua) ei Peresideni no te Autahuáaraa Rahi, oia te Peresideni Matamua no te Ekalesia taatoa, e te hoé amuiraa Ekalesia i haapaohia i Amerese, (Amherst), i Obaio. E ua faarii-faabou-hia Iosepha ei Peresideni no te Autahuáaraa Rahi e te hoé apooraa i haapaohia i te 26 no Eperera, 1832.

Uiraa 14. Eaha mau te mahana i faatiahia'i te pupu o te Peresideniraa Matamua?

P. Tei te mahana 18 no Mati, 1833, te faatia-raa-hia o te Peresideniraa Matamua no te Ekalesia, ei taua mahana ra, ua faatoroa Iosepha (metua) ia Sidine Ritidone ei tauturu hoé, e ia Frederika G. Williams ei tauturu piti, e ua riro atura ratou ei Peresideniraa Matamua no te Ekalesia.

“O tei parau mai ia Ziona, Inaha, tei te Atua ra te hau: Mai te hau o Karamela ra, oia atoa te ite o te Atua i pou mai i nia ia ratou.” (B.F. 128-19. B.F.S. 110.)

— *Papaihia e Timi Timo Mapuhi*

Te Ho'e Leta Faaitoitaraa no te Mau Hoa o te Heheuraa Apî

Takaroa, i te 29 no Me, 1927.

Na te mau hoa no te Heheuraa Apî:

Ia ora na outou i te here o te Atua e a muri noa'tu.

O vau, o to outou taeae i te faaroo nei, oia hoi, Tuhiva â Makitua. Te faaite atu nei au ia outou i te huru mau no to'u tere i Takaroa. Ua tapae au i taua fenua ra i te hora 12 i te avatea no te mahana Sabati. A haamata ai te pure-raa oroá i te ahiahi, ua horoahia mai te hoé tufaa aóraa evanelia. Ua faaite atu vau i te huru no te mau Amau ta'u i haere ai, mai Fakarava, Fanite, e Kauehi, e te huru no te mau ohipa i ravehia i reira. Ua taió atoa vau i te parau i papaihia i roto i te Ioane 9:1-7, no nia i to Iesu

faaoraraa'tu i te mata o te taata matapo, no te mea, te hae-re nei na orometua e faaora i te mata o te feia i matapohia i roto i taua mau fenua ra.

I taua rui ihora, ua faaterehia te haapiiraa no te Feia Apî, no taua Amaa ra. Na Heia, peretetini no te Feia Apî, e ta'na na tauturu, i faatere te mau mea'toa. Ua oto mai te pupu pû i roto i te tahi mau himene, e e mea nehenehe hoi te reira. Ua faaterehia te haapiiraa no nia i te parau no Iosepha e to'na na metua tei fanau mai ia'ua, e ua tuu-atoa-hia ta te Feia Metua haapiiraa ia ratou, oia hoi te haapiiraa no nia i te huhutiraa i te titona e te titania. Ua faatai-atoa-hia te mau kitara i roto i taua haapiiraa ra, e ua nehenehe hoi te reira. No to'u oaoa i te mau mea maitatai ta'u i faaroo i horoa'tu ai au i te tahi faufaa ei tauturu no te pupu pû i roto i ta ratou ohipa maitatai.

E te mau hoa no te Heheuraa Apî e, e te mau Feia Apî no te mau fenua'toa, noa'tu te huru o te mau faaroo, a hió i te maitai no te Feia Apî no taua fenua ra. No reira te parau atu nei au ia outou e, ia hinaaro outou i te ite i taua maitai ra, a pure i te Atua, mai te opua i te haapao i ta'na ra mau ture, e na'na e horoa mai i te maitai ia outou.

A taió maite tatou i te hoé irava i roto i te Koheleta 12:1. "E tena na, e haamanaó i tei Hamani ia oe i to apî-raa ra, aita i tae i te mau mahana ino ra, e aita i tae i te mau matahiti e parau ai oe ra e, Aita roa o'u maitairaa." Mai te au i tana irava nei, teie iho â ia te taima e au no te haapaoraa, oia hoi, i to apîraa. E no reira e hoa ma e, a hió i te maitai i ravehia e te Fei Apî i Takaroa, e tapea hoi te reira ia maitai outou iho.

To outou taeae haehaa i te Fatu nei,

TUHIVA á MAKITUA

Te Mau Parau Apî

Ua haamatahia te hoé socaete taata poria i te fenua ra i Roma. Ia hinaaro te taata i te tomo i roto i taua socaete ra ei nia aé oia i te 95 kilo e tia'i. Ua maitihia te taata ra o Caralo Rota, e 160 kilo to'na, ei peresideni no taua socaete ra, e tei roto i te reira e 30 taata i teie nei mau mahana.

I te avaé Tiunu, ua iteahia te tahi mau mea tahito roa i roto i te fenua ra i Ierusalema. Tei rotopu i taua mau mea i iteahia ra, te hoé farii maa huru rahi, tei nia iho i te reira e maha mauraa rima, e tei roto i te reira te tahi maa paari roa. Ua itea-atoa-hia te tahi farii faraoa, e te hoé taviri uaina, e te hoé fare i parauhia te utuafare no to Iseraela. Ua tanuhia taua mau mea ra i te tau tahito roa ra, e piti tauatini e pae hanere (2,500) matahiti i mairi aénei, e te vai maitai noa ra ratou mai reira mai â i teie nei mau mahana.

Ua manuia roa te tahi mau taata i to ratou maueraa, i roto i to ratou mau pahi reva, mai te fenua Marite e tae roa atu i te fenua Farani. E te tauturu nei taua ohipa ra i te manaó no nia i te ravea e haavíhia'i te móana, ia tae te taata i te mau vahi atea atoa ra. Ua manaóhia e piti eá apî no te pahi reva i teie nei mau mahana; te hoé mai te fenua Marite Apetoerau e tae roa'tu i te fenua Vaihi. Ua tuu mai te hoé taata no Vaihi i te moni ra, e toru ahuru e ma pae tauatini (35,000) dara no te rê matamua, e e hoé ahuru tauatini (10,000) dara no te piti o te rê no taua maueraa ra. Ua tuu atoa te tahi taata i te moni ra, e toru ahuru tauatini (30,000) dara no te maueraa na nia i te piti o te eá, o tei haere mai te oire Los Angeles i te fenua Marite e tae roa'tu i te oire ra o Tokio i te fenua ra i Iapone. Te haamataraa teie mau maueraa no te hoé mau ohipa rahi, oia hoi te afairaa'tu i te mau vea, te mau leta, e te mau horopatete i te tahi oire e te tahi oire e ati noa'é i te ao nei.

Na roto i te hiópoaraa i te mau fare hoo pereoo uira (auto), i te fenua Marite, ua faaitehia mai e, te vai ra e piti ahuru e ma piti milioni (22,000,000) fatu pereoo, e ua pau e hoé ahuru e ma maha bilioni (14,000,000,000) dara i te matahiti hoé, no te hooraa e te haapaaraa i tana mau pereoo ra.

I roto i te oire Fairmont i te fenua Marite, te ora nei te hoé taata matapo, ua matapo oia mai to'na fanauraa mai â i teie nei mau mahana. Ua haapiihia râ oia i roto i te mau haapiiraa teitei, e ua noaa ia'na te toroa ra paruru ture. No te mau uri i roto i taua oire ra, ua imihia te hoé taata au no te ohipa haruraa uri, e na taua taata matapo ra i ani atu i te tomite faatere ia maiti ia'na no taua ohipa ra, noa'tu to'na matapora ua ite papu oia i te mau uri atoa. Te tere atoa ra taua taata ra i roto i to'na boti i nia iho i te mau roto fatata i taua oire ra, e aita roa oia i moe. Aue! teie ohipa maere e!

I te 22 no Tiurai, na pohe te arii no te fenua ra i Roumania. I roto i te matahiti i mairi aénei ua tupu te hoé maí riáriá roa i nia iho ia'na, e aita roa te mau taote i ite i te ravea e ora mai ai oia no roto mai i te reira. No to ratou ite e pohe iho â oia, ua haapiihia ta'na tamaiti ra o Mira, i te mau huru ohipa faatere no taua basileia ra. Ei te 22 no Tiurai ua riro oia ei arii i nia iho i taua fenua atoa ra; area râ, e pae noa iho matahiti to'na, e no reira te faatere nei te hoé apooraa i te ohipa e tae noa'tu i te mahana e tia ia'na ia faatere. E tamaiti ite roa oia i te reó Farani, Baretane, e to'na iho reó, e e rave rahi atu â te mau ohipa maere ta'na i ite.

Alma G. Burton Imprimeur,

Rue Brea et de la rue Dumont d'Urville, Orovini, Papeete